

Istorgia culturala

«Marellas» dal Radio Rumantsch sin disc compact, part 12

Heidi e Jenatsch – u: wär hät's erfunda?

Il 1876 ed il 1880 cumparan en Germania dus bestsellers che fan furora: il «Jürg Jenatsch» da Conrad Ferdinand Meyer e «Heidi's Lehr- und Wanderjahre» da Johanna Spyri. Tant l'istorgia da l'erox ambivalent Genatsch sco er quella da la matta pura da las muntognas derivan da la plima da dus auturs da Turitg. Spyri e Meyer, dus citadins da buna chasa, han stgaffi, furmà e cementà dus dals gronds mitus dal Grischun. La Marella sa metta sin ils fastiz da Spyri e Meyer e da lur amicizia sco er da la creaziun e l'eco da lur ovas. (Emissiun dals 17 da november 2013; redacziun: Guadench Dazzi).

Da canagls e langeghers – Viadi tras l'istorgia criminala dal Grischun

En il tschaler da la Polizia chantunala a Cuira datti in museum che preschenta l'istorgia dals langeghers, bandits e lumbarduns. Sper l'istorgia da la polizia dal Grischun chatt'ins qua documents originals davart delicts spectaculars. La Marella fa in viadi tras l'istorgia criminala dal Grischun; raquinta da la lavur e



da las tecnicas dals anteriurs langeghers e sa metta als fastiz da l'assassinat d'in uffant a Laax, d'in cas d'amoc il 1959 a San Murezzan, da la mort tragica d'in policist a Danis-Tavanasa e d'in rapinament da posta spectacular a Cuira. (Emissiun dals 12 da settember 2010; redacziun: Guadench Dazzi).

«Fortüna, fö in cha da sar Lureng!» – il di che Lavin ha midà sia fatscha

L'emprim d'october 1869: «Di da conturbel e stramizi terribel per noss pover, disfurtinà Lavin.» Lavin arda! Jon Guadeng Steiner descriva be duas emnas suenter l'incendi quest di ch'ha devastà la gronda part da Lavin. 68 chasas e clavads èn vegnids magliads dal feu, trais persunas han pers lur vita en las flommas e blers han pers lur dachasa per adina. Il cumin da Lavin sez ha midà sia fatscha – sias fatschadas – per adina. La Marella sa fa 145 onns pli tard sin ils fastiz da quest di da catastrofa a maun da documents e descripiuns istoricas. (Emissiun dals 28 da settember 2014; redacziun: Anna Serarda Campell).

TRUNS – tut sin mesira!

Ina fabrica vegniss 100! 1912 è ella vegnida fundada, la fabrica da ponn e vestgadura TRUNS. Ella ha dà lavur a millis da persunas en la Surselva, ed ella ha tessi e cusì vestgids sin mesira, unifurmas e confecziun. Oz regordan suletta-main ils gronds bajetgs a Trun a la

fabrica. Per ils da Trun èn las regurdient-schas dal temp cun la fabrica dentant anc oz fitg preschentas. (Emissiun dals 3 da zercladur 2012; redacziun: Esther Berther).

Selva oz e Selva avant 60 onns

Sch'i na dess betg il golf e las chasas da vacanzas, lura fiss Selva oz in vitg quasi mort or. Trais persunas han anc lur domicil stabel a Selva. Avant 60 onns aveva Selva 90 abitants, 30 da quels eran uffants sut 15 onns. La notg dals 11 sin ils 12 da zercladur 1949 ha in immens feu devastà quasi dal tutfatg il vitg da Selva. Dapi lura è tut sa midà. Il vitg è vegnì reconstruì, ma la depopulaziun n'ha betg pudì vegnir franada. La Marella porta impressiuns da Selva oz e lascha raquintar tranteren trais persunas da quai ch'è capità avant 60 onns. (Emissiun dals 31 da matg 2009; redacziun: Maria Cadruvi).

Pader Placi a Spescha, naschi avant 250 onns

Merits ha pader Placi (1752–1833) sin blers champs. El è stà in dals emprims ch'ha vis ils panoramas davent da las pli autas muntognas da la Surselva, el è stà in pionier sin il champ social ed el ha perfin scrit ina brev a Napoleon. Placi a Spescha n'è betg stà in tipic pader da la claustra da Mustér e tuttina ha el pudì viver sia vita mo grazia al fatg ch'el era pader. (Emissiun dals 8 da december 2002; redacziun: Daniela Cavelti).

La pioniera ed il guid da muntogna: Rebels da la gripa

Elizabeth Main (1861–1934) e Christian Klucker (1853–1928) n'èn probablamain mai s'inscuntrads. Er sch'i fiss stà fitg bain pussibel. Ella, ina nobla englaisa, ha fatg ina carriera sco alpinista senza congual. Cun rassa e zappunet da glatsch ha ella cuntanschì ils pizs ils pli auts en l'Europa – e quai cunter tut las convenziuns. En il satgados aveva ella adina cun ella l'apparat da fotografar. El, in Engiadinais da Fex, vala fin il di dad oz sco in dals megliers guides da muntogna ch'igl ha dà en Svizra. El ha guidà ils pli enconuschents alpinists da quel temp, Ludwig Norman-Neruda u Edward Whympfer, ed è daventà in'icona. Quai che Elizabeth Main e Christian Klucker han communabel è in spiert d'aventuriers, in caracter da rebel ed ina passiuun senza cunfins per las muntognas. Ella era «be» ina dunna, el «be» in guid da muntogna. Tuttina: tuts dus han scrit in'autobiografia – las funtaunas per questa Marella. (Emissiun dals 3 da november 2013; redacziun: Anna Serarda Campell).

Greti Caprez, la plevonessa «illegala»

Ils 13 da settember 1931 fan ils abitants da Furna en il Partenz in pass nunusità:



Greti Caprez-Roffler.

FOTO: PD

Els elegian ina dunna sco plevonessa. Greti Caprez-Roffler ha quella giada 25 onns, in pop da 9 mais ed in um che lavura sco inschigner a Turitg. Ella accepta l'uffizi e va a viver a Furna. Greti Caprez è cun quai l'emprima dunna sin chanzla e l'emprima plevonessa en Svizra che maina ina pravenda. Quest pass è nunusità e tenor lescha ecclesiastica illegal. Pir 34 onns suenter, il 1965, vegnan las dunnas uffizialmain admessas sco predigtantas en il Grischun. La Marella suonda las cuntraversas ed ils cumbats d'ina dunna naschida memia baud. (Emissiun dals 30 d'avust 2015; redacziun: Christina Caprez).

Christianus Caminada (1876–1962)

Ils 22 da schaner 1962 è sa reunida tut la prominenza grischuna ed er il Radio Rumantsch en la catedrala a Cuira per la messa da bara da monsignur uvestg Christianus Caminada. Sco um da la baselgia s'interessava il Lumnezian er per ils cults precristians. Ses cudesch «Die verzauberten Täler» sa chatta actualmain en la 7avla ediziun. Co ha delecterà Rest Giusep Caminada sez sia passiuun per il mund pajau e tge impurtanza han sias retschertgas oz? Cun material or da noss archiv ed ensemen cun l'etnolog Peter Egloff sa metta la Marella als fastiz da questa personalitad marcanta. (Emissiun dals 22 da schaner 2012; redacziun: Guadench Dazzi).

En viadi ier ed oz –

tras il Surses en trais tschientaners

Las ustarias na fan nagin gust da sa fermar, las dunnas n'èn er betg las pli bellas – ma la cuntrada è grondiusa. In viadi

tras il Surses è in viadi tras l'istorgia dal turissem, da la construcziun da la via chantunala, u la construcziun dal grond lai da fermada Murmarera. En nossa seria da stad avain nus fatg il viadi tras il Surses, da Casti enfin Beiva, accompagnads da dus guides da dus differents tschientaners. Bler è sa midà en il temp, ma betg tut! (Emissiun dals 24 da fanadur 2011; redacziun: Pia Plaz).

En viadi ier ed oz – sin la planira da la Greina

Avant bundant 200 onns ha pader Placi a Spescha fatg per la terza giada in viadi sur la Greina. El vuleva malegiar ina charta detagliada, si'idea era ina via sur la Greina. Oz faschain nus puspè ina part da quest viadi e quai ensemen cun Alexi Nay. Er el ha, sco pader Placi, ina relaziun cun la Greina. In viadi davart il passà, dentant cun impressiuns e regurdient-schas dad oz. (Emissiun dals 7 d'avust 2011; redacziun: Esther Berther).

«Giarbinellas, fam e mordrertschs». L'Engiadina enturn il 1800

Ella è Schlarignotta da buna chasa, el ferrer e viturin da Segl. Anna Curò-Frizzoni (1758–1837) e Paul Robbi (1759–1847) han scrit lur «memorias» en furma da diari. Els rapportan minuziusamain dals onns turbulents 1797–1803 cun lur charplinas, guerras e fominas. Suenter stgars 300 onns han ins stuì sepulir la veglia Republica da las Trais Lias, ina da la grondas cesuras en l'istorgia grischuna e l'ultima giada ch'ina guerra ha tutgà cun tutta vehemenza il Grischun. Sper ils fatgs politics rapportan Curò e Robbi da stads sitgas, envierns lungs u mazzaments spectaculars. (Emissiun dals 24 da november 2013; redacziun: Guadench Dazzi).

En viadi ier ed oz – cun Johann Franz a San Murezzan

1837 ha Johann Franz, in scriptur oriund da la Turinga, publictà il cudesch «Das Engadin und die Engadiner» en il qual el descriva tranter auter co che las curas d'aua funcziunavan pli baud a San Murezzan. Co vesa quai or suenter 174 onns? En nossa seria da stad essan nus ids sin ils fastiz dal diari da Johann Franz. Nus avain cumpareglia il lieu, la gliued e natiralmain er la funtauna, il «Sauerbrunnen», da San Murezzan. (Emissiun dals 10 da fanadur 2011; redacziun: Andrin Willi).

En viadi ier ed oz – en ziczac tras la Surselva

Tranter ils onns 1838 e 1842 ha il scriptur e dissegnader genevrin Rodolphe

Toepffer visità trais giadas il Grischun. Dus giadas è el chaminà cun fasch e fagot tras la Surselva. La «haute vallée de Disentis» descriva el en ses cudesch «Voyages en Zigzag ou Excursions d'un Pensionat en vacances»: ina val nua ch'il progress n'era anc betg arrivà. Ina val cun in problem: il rumantsch che tuna tenor Toepffer sgarschavel e ch'impechescha mintga comunicaziun. (Emissiun dals 14 d'avust 2011; redacziun: Esther Krättli).

Sur Bernina ier ed oz – en viadi cun guides turistics d'avant 100 onns

La Viafier dal Bernina han ins concepì gia avant 100 onns sco lingia turistica. Il trassé maina lung ils vadretgs dal Morteratsch, Cambrena e Palü fin sin 2252 m s.m. Ed er il viadi a val fin Tirano sin 429 m s.m. n'è betg main spectacular. Las guides da viadi d'avant 100 onns eran perquai euforicas: «La pli bella, la pli giagliarda e la pli impertinenta viafier dal mund». Co eri da far quella giada in viadi en tren sur il Bernina, tge è sa midà e tgi sesa oz en il Bernina Express? La Marella è in viadi da San Murezzan a Tirano e sfeglia en ils guides turistics d'antruras. (Emissiun dals 20 da zercladur 2010; redacziun: Guadench Dazzi).

En viadi ier ed oz – in viadi da stad en S-charl

L'onn 1923 descriva il schurnalist Hans Schmid la spassegiada a pe da Scuol en la Val S-charl. L'onn 1962 gira Tumasch Tach, il protagonist dal roman «La Müdada» da Cla Biert sin quella via. Oz fan ins quella ruta surtut cun velo. Er la Marella ha fatg il viadi en il vitg oriund dals miniers, oz enconuscent per sia buna cuschina. Ier giev'ins en S-charl cun char e cun charrotscha, oz patgific cun l'auto u cun la posta. Ier giev'ins a chatscha da l'urs, oz profitan blers dal mitus da l'animal. Il temp sa mida, u cun il plect or dal roman da Cla Biert: «Il temp es la müdada». (Emissiun dals 21 d'avust 2011; redacziun: Sara Hauschild).

En viadi ier ed oz – Veulden, in stgazi d'istorgias e cardientschas blaus

Ils onns 1947 e 1948 han il scriptur svedais Eyvind Johnson e sia famiglia pasentà en Svizra – la stad mintgamai a Veulden. En ses cudesch «Notizen aus der Schweiz» descriva el sias observaziuns en il vitg muntagnard che giascha sin ina terrassa sulegliva sur la Tumblestga. En nossa seria da stad essan nus turnads a Veulden ed avain discurre cun la gliued sin via. E tuts han menziunà ch'il Plasch possia raquintar il pli bler. E propi, Plasch Barandun enconuscha mintga chantunada da Veulden. (Emissiun dals 17 da fanadur 2011; redacziun: Valentin Schmed).

En viadi ier ed oz – tras la Val Medel

Noss viadi maina nus tras la Val Medel. Il viadi cumenza sin il Pass dal Lucmagn e va a fin a Curaglia. Sin quest viadi raquintan nus tranter auter dals ospizis da Sontga Maria e da Sogn Gagl, da la lavina dad Acla 1975 e dal privel da lavinas insumma en la val. In tema è er la punt romana ed il hotel Lukmanier, omadus èn objects da muntada istorica. (Emissiun dals 31 da fanadur 2011; redacziun: Hubert Giger).

La preschentaaziun:

«Marellas» dal Radio Rumantsch: Contribuziuns emessas ils onns 2001–2015, accessiblas en la Biblioteca chantunala sin disc compact.

Dapli infurmaziuns:

chatta.ch/?hiid=4734
www.chatta.ch



La fabrica da ponn a Trun ils onns 1950.

FOTO: WERNER FRIEDLI / CC BY-SA 4.0